

痛史

第十六種

鹿樵紀聞

卷之六

卷之六

國朝紀略

中華民國元年六月初版

(痛史第二十種 國變難臣鈔一冊) 附錄三種

(每冊定價大洋壹角)



校訂者兼
印行者

商務印書館

印刷所

上海、北河南路北首寶山路
商務印書館

總發行所

上海四馬路中市
商務印書館

自敘

寒夜鼠燭架上發燭照之則明季三王時邸報臣畜之以爲史料者也年來幽憂多病舊聞日落十年三徙聚書復闕後死之責將誰任乎臣因是博搜見聞講求實錄刊訛謬芟蕪穢補缺遺類分爲四十一篇自福王至桂王更七載而勒成一書名之曰鹿樵紀聞所以成一代鼎革之言也或曰子之所言皆信而無疑乎曰作春秋者所見異辭所聞異辭所傳聞異辭所見三世所聞四世所傳聞者五世世遠而聞見因以不齊三傳所以多龐也太史公成一家書而年表與本紀之年世家與列傳之事或自爲牴牾者多亦有傳聞者使之然與茲雖採紀說諮之耳聞猶從及見之年臣敢以自欺者欺人哉執簡之臣不以忌諱於當時之士謂狂言可矣婁東梅村野史

鹿樵紀聞目錄

卷上

福王上

史可法殉揚

兩太子

使臣碧血

南國愚忠

項周失節

卷中

唐王

鄭成功之亂

舟山始末

兩先生傳

福王下

黃高二鎮

兩疑獄

南都死難

嘉定之屠

馬阮始末

魯王

張煌言殉節始末

日本乞師

山右二臣

鹿

樵

紀

聞

目錄

關西二烈

秦晉宗人

獻忠屠蜀

川中諸將

沙定洲之亂

老神仙

卷下

桂王上

桂王中

桂王下

粵東三烈

孫李構難

繡花針傳

紀新會婦事

粵西二臣

隸僕

乞兒

闖獻發難

自成犯闕

槐國政

西平乞師

郡邑紀聞

鹿樵紀聞卷上

福王上

順治元年四月戊午朔。明留都聞京師之變。尙書史可法、高宏圖、都御史張愼言等。誓告天地。號召四方起義勤王。各鎮潰兵南下。沿途刼掠。淮撫路振飛、巡撫王燮、分兵防堵。收斬僞官。已知崇禎殉國。文武諸臣會議立君。愼言及呂大器、姜曰廣等。皆言福王神宗孫也。倫序當立。而素多失德。又不讀書。有七不可。不若潞王常澐賢當立。可法意亦在潞王。獨都諫章正宸爭之。謂潞王不可越福。猶福之不可越先廟也。可法遲疑未決。初賊陷洛陽。福世子德昌王脫走出城。時寇事方棘。崇禎帝未暇訪求。莫有知其處者。馬士英在鳳陽。或首私藏王印。取驗之。則福邸藩舊物。詰其所自。曰有負博者以質錢。因物色其人。得之儀真。士英素不識王。猶未稔其真僞也。適會

國變。因念此奇貨可居。致書大臣。謂以序賢無如福王。可法卽以七不可之說移書答之。士英與阮大鍼謀。謹藏其書。而潛結操江誠意伯劉孔昭。及鎮臣劉澤清、劉良佐等。同心翊戴。發兵奉福王至龍江關。可法不得已。率羣臣迎謁舟次。王角巾葛衣。坐寢牀。隨從田成輩布衣草履。不勝其困。五月戊子朔。王入城。以內守備府爲行宮。或議卽日登極。可法以太子二王存亡未卜。定於初三日行告天禮。先上監國之寶。王色赧然欲避。是日有兩星夾日而行。蓋辰星及太白也。而諛者目爲景星。望日壬寅。王僭帝號。以明年爲弘光元年。拜史可法禮部尙書。姜曰廣禮部侍郎。兼東閣大學士。與士英宏圖並相。可法仍掌兵部事。士英大怒。以可法七不可之書奏之王。而擁兵入朝。詔陞士英兵部尙書。入閣辦事。命萬元吉宣諭江北。黃得功進爵爲侯。劉澤清、高傑、劉良佐皆封伯。時高傑方與黃得功爭揚州。江督袁繼咸入見。奏曰。封爵以功。無功而伯。則有功者不勸。跋扈者益多。福王領之。乙巳。路振飛罷。馬士英欲用田仰也。振飛在淮上守禦頗備。論者惜之。設四鎮。各有汛地。兵馬錢糧。聽其自調。壬

子。史可法督師江北。可法以前書故內不自安。會萬元吉至淮上。疏言。所在兵民相角。一城之隔。兵以民爲仇。民以兵爲賊。臣望輕位卑。雖有安民之心。絕無緩兵之策。非得大臣鎮撫不可。可法因請出以避士英。吳縣盧渭。率太學諸生乞留可法。不聽。馬士英口大計四事。一聖母宜迎。一皇考梓宮宜遷。一諸王宜防。恐奸人挾之爲變。宜召置近地。一皇子未生。宜選淑女。聞者笑之。題句於宮城曰。北不永。南不光。真人未出。賊任牛。官任馬。異類同時。閣部因會推。吳姓、鄭三俊、與劉孔昭憤爭於朝。高宏圖、張愼言。皆因疾乞休。王慰留之。北都捷聞。遙封吳三桂薊國公。予世襲。六月丁巳朔。上崇禎帝諡號曰思宗烈皇帝。周皇后曰孝節皇后。史可法奏敵兵南下。請遣使賈監國卽位二詔。及封吳三桂敕。往山東北直處撫諭。癸酉。命阮大鍼復冠帶來京。陛見。高宏圖及科道官爭之不聽。大理寺丞詹兆恆。又疏進莊烈帝手定逆案。士英聞之。亦以是日進三朝要典。王遂特召大鍼。大鍼入見。泣陳陷入逆案之枉。且曰。陛下知君父之仇未報。亦知祖宗之讎未報乎。兆恆字月如。廣信人。崇禎辛未進士。後

從唐王聚兵於懷玉山。將攻衢州。戰敗而死。起錢謙益爲禮部尙書。劉宗周爲左都御史。陳體正爲儀曹。惟體正不赴。賦詩曰。京華歌舞新南極。衡泌洑瀾舊帝星。識者高之。丙寅。吏部侍郎呂大器。以疏參馬士英。與尙書張愼言同罷。愼言字金銘。陽城人。子履旋。壬午舉人。賊陷陽城。履旋投崖死。事及愼言去位。流寓蕪湖。國亡後。疽發於背。戒勿藥而卒。馬士英以國朝諭江南官民奏聞。請擇人使北議款。賜北都殉難臣尙書范景文、倪元璐、侍郎王家彥、孟兆祥、左都御史李邦華、大理寺卿凌義渠以下。共二十五人祭葬。諡贈有差。李沾自敘定策功。陞左都御史。道臣李謨上言。今日諸臣能各刻刻自認先帝之罪臣。方能爲陛下之功臣。且擁立之事。陛下旣不以得位爲利。諸臣又何以定策爲功。不報。丙子。湖廣按臣黃澍入對。面訐馬士英奸貪不法。汨與語俱。王爲感動。士英不能辨一語。引疾乞休。隨輦金帛賂福邸舊閹田成。成泣語王曰。皇上非馬公不得立。今逐之。必謂皇上負恩。且馬公在。諸事可不煩聖慮。馬公去。誰復念皇上者也。福王默然。成卽傳諭士英仍入閣辦事。己卯。命選淨身男

子。釋高牆罪宗七十五案。追諡建文帝曰惠宗。讓皇帝。上景帝廟號曰代宗。張獻忠陷重慶。是月。王師破德州。山東郡縣皆迎降。惟濟寧猶爲明守。七月丙戌朔。科臣章正宸疏論文武儉安。不思討賊。兼及議款之非。熊汝霖亦極言內外交通。神叢互借。得嚴旨。封太妃弟郭守義。福府千戶常應俊。皆爲伯。辛卯。遣左懋第陳洪範使北。庚子。王生日。受朝賀。勲臣皆有進。是月。闖賊出潼關。攻密縣。八月丙辰朔。命錦衣指揮馮可宗得遣使役緝事。以逆案楊維垣爲通政使。科臣陳子龍疏言。近日中使四出。民間女子稍有姿色。卽以黃紙貼額。選入宮中。閭里騷然。請行禁止。不報。戊辰。太妃至自河南。限工部三日內括銀幣以備賞賜。兼辦一應陳設。又諭行宮湫隘。急修西內。隨傳太妃命令選中宮。是月。地一日三震。長庚見東方。光芒閃爍。中有刀劍旌旆之影。張獻忠陷成都。浙江東陽民變。九月丙戌朔。以大鍼添註兵部右侍郎。同辦部事。主事尹民興疏言。兵部以討賊爲職。今抗顏居堂上者。乃一逆案間徒之臣。卽移檄四方。何以折跋扈將軍之氣。不報。時中外攻大鍼者甚衆。大鍼憤曰。彼攻逆案。我

作順案相對耳。於是峻士英嚴處降賊諸臣。周鍾、光時亨等。以折東林之氣。甲午。大學士姜曰廣罷。逮主事周鏞。山東僉事雷縯祚。初。大鉞避寇白門。妙選聲妓。東林復社諸名士。時多聚於雨花桃葉間。而鏞實爲之主。語及大鉞。輒戟手痛罵。大鉞聞之。嚼齧搥牀。思一旦得志。起大獄殺之。至是先以蜚語逮鏞。并及縯祚。繫獄嚴訊。校尉四出。諸人踉蹌奔避。善類爲空。乙未。左都御史劉宗周罷。士英初意頗向宗周。一日閣中語及故庶吉士張溥。士英曰。我故人也。酌而哭之。姜曰廣笑曰。公惡東林者。亦口東林耶。士英曰。我非叛東林者。東林拒我耳。又心德大鉞之薦。欲兩用之。而邪正不能並立。不得已出劉而入阮。嘗賦詩曰。蘇蕙才名千古絕。陽臺歌舞世間無。若使同房不相妒。也應樂殺竇連波。蓋以蘇喻劉。陽臺喻阮也。丁未。選淑女黃氏郭氏入宮。仍命再選。有母女自盡者。馬士英請州縣生童納金免考。奉化布衣何光顯疏馬士英罪。發刑部問罪。己酉。移黃得功駐廬州。高傑駐徐州。副總兵黃斌卿駐九江。鄭鴻逵駐京口。黃蜚駐采石。開助工例。時內操額兵四十餘萬。需餉幾八百萬。司農悉

各項所入。止六百餘萬。又內有宮俸國用之供。外有水旱災傷之耗。不能給。而宮室服用。百役並作。皆援全盛之例。費無紀極。於是開事例。賤其值以招納來者。士英輩因而乾沒。民間有中書隨地有。都督滿街走。監紀多如羊。職方賤如狗。蔭起千年塵。拔貢一呈首。掃盡江南錢。填塞馬家口之謠。大旱。自四月不雨。至於是月。烈日常如盛夏。震澤巨浸。褰裳可涉。十月己卯朔。大學士高宏圖字研文。膠州人。既謝政。無家可歸。流寓會稽。國破後。逃野寺中。絕糧而卒。當高宏圖在位。福王猶時親政事。及馬士英代爲首輔。福王拱手聽之。深居禁中。惟以演雜劇。飲火酒。淫幼女爲樂。民間稱之曰老神仙。以解學龍爲刑部尙書。學龍字石帆。興化人。又命阮大鍼巡江。先是錢謙益入都。其妾柳如是戎服控馬。插裝雉尾。作昭君出塞狀。及阮大鍼誓師江上。衣素蟒。圍碧玉。見者詫爲梨園裝束。皆服妖也。又有縣令張丁乾。罷官回籍。遇賊削其耳鼻。流寓江寧。當道憐之。補應天府教授。乃爲木耳木鼻。遇朝會。用以飾觀。亦不祥之兆。西宮落成。改名慈禧殿。分遣內官催各省金花殿價。及一應年額關稅鹽課。禮部再選

淑女富室官家有隱匿者。四鄰連坐。是月。國朝發兵。肅王由山西入秦。英王向河南。豫王出山東。趨徐州。十一月甲午。王師破海州。抵宿遷。未幾引還。史可法以聞。馬士英大笑。坐客楊文驄問故。士英曰。君以爲誠有是事。此乃史公妙用也。歲將盡。防河將吏應敘功。耗費軍資。應稽算地耳。乙未。鳳陽祖陵地震。史可法上疏。略云。數月以來。陵廟荒蕪。山河鼎沸。復仇之師未出。河上之防未固。此時卽卑宮菲食。臥薪嘗膽。尙恐無濟於事。今觀廟堂之作用。百職事之精神。殊未盡然。憶陛下初蒞南都。語及先帝。則泣下沾襟。進謁孝陵。則淚痕滿袖。曾幾何時。可忘前事。先帝以聖明罹慘禍。此千古未有之變也。先帝崩於賊。恭皇帝亦崩於賊。此千古未有之仇也。庶民之家。父兄被殺。猶思穴胸斷脰。得而甘心。朝廷顧可膜置。又近得北示。公然以逆遇我。和議決不可成。和不成。惟有戰。戰。闔外事也。然闔外視廟堂。廟堂視皇上。伏願深思痛念。無然泄沓。愼名器以勸有功。假便宜而責成效。凡不急之工役。可省之繁費。一切報罷。聲色之蠱惑。左右之獻諛。一切謝絕。卽事關典禮。亦概從儉約。朝乾夕惕。振舉

朝之精神。萃四海之物力。以併於選將厲兵一事。庶人事克盡。天意可回。疏入。福王及馬士英皆不省。時人有詩曰。萬卷當百城。偏閱及諸子。諸子暗而駭。經濟還推史。又曰。尙方有寶劍。相傳出歐冶。砍斷佞臣頭。試取先斬馬。又曰。伊昔竹林客。狂邪首阮公。自從名教壞。不復哭途窮。又曰。新印銅山鑄。鉤金換一緡。看來鵝眼樣。不是舊時錢。又曰。世人但求福。危哉禍所倚。寄語塞翁知。得馬莫狂喜。辛丑。奉先殿上梁。高皇建殿餘材。貯工部庫。且朽矣。逢君者指爲神木。自至。於是土木大興。是時又將大婚。內府造皇后禮冠。需貓睛石。祖母綠及珠。自一錢以上者百十顆。商人估價數十萬。司京兆公疏乞減。始定限。禮冠三萬兩。常冠萬兩。部臣復言。點金無術。再懇從儉。不報。乙巳。馬士英請權酒助餉。每觔一文。布衣何光顯請斬奸相。命戮於市。籍其家。臘月乙卯朔。道臣夏尙綱進贖鍰助餉。士英怨其不以充私。候革職提問。丙寅。戎政趙之龍獲僧人大悲。下鎮撫司獄。刑部奏從逆六案。一等應礫。宋企郊。牛金星。張嶙然。曹欽程。李振聲。喻上猷。黎志陞。陸之祺。高翔漢。楊王休。劉世芬。十一人。二等秋決。

光時亨、鞏燾、周鍾、方允昌、四人。三等絞贖。陳名夏、楊觀光、廖國遴、王承曾、原毓宗、何胤光、項煜、七人。四等戍贖。王蓀蕙、梁紹陽、錢位坤、侯恂、申芝芳、金汝礪等、十五人。五等配贖。宋學顯、方拱乾、繆阮、方以智、傅鼎銓、張家玉等、十人。六等杖贖。潘同春、吳泰來等、八人。存疑另議。翁元益、史可程、吳爾燠、王自超等、二十八人。時馬阮必欲殺周鍾。擬旨。周鍾、陳名夏等未蔽厥辜。令再議。御史張孫振等因痛詆尙書學龍曲庇行私。學龍遂削籍去。然學龍所定案亦多漏網。而所擬一等諸犯皆隨賊而行。實未嘗正刑也。除夕。福王居興寧宮。愀然不樂。太監韓贊周進曰。新宮宜懽。而皇上如有所慊。得母念皇考乎。福王不應。旣而曰。梨園殊少佳者。

福王下

順治二年正月乙酉朔。日食。明福王罷朝。設宴內殿。值天陰晦。意頗不懌。諸內臣竟下殿除窗櫺。福王曰。不必。朕在此坐不久。聞者皆駭其不祥。壬辰立春。是夜。流星入紫微宮。癸巳。江寧震電。大雨雹。明日。三法司會訊大悲。辭連申紹芳、錢謙益、阮大鍼。

欲借以除東林及素所不合者。因造十八羅漢五十三參七十二菩薩等說。書史可法、高宏圖、姜曰廣、姓名。納大悲袖中。錢謙益先以上疏頌士英。又爲大鉞頌功。修好矣。而大鉞憾不釋。亦列名將窮治其事。而君相不欲深究。大悲坐妖言律論棄市。福建盜閩豬婆王據簾子洞劫掠。巡撫張肯堂招之勤王。至浙江。復叛去。己亥。重刊要典。更定逆案。於是在案諸臣。亡者予葬祭贈諡。存者皆原官先後起用。科臣袁宏勳迎大鉞意。疏極糾故臣王之案。孫慎行、楊漣、左光斗、及現任吳甡、鄭三俊等。士英票擬事屬已往。不必追論。王師渡河。史可法奏遣高傑扼虎牢。劉良佐駐邳宿。又上疏略云。陳洪範還。和議已無成矣。向以全力禦賊而不支。今又分以禦敵矣。宋唐門戶之禍。與國終始。臣願廟堂之上。深思先帝之仇。勿修睚眦之怨。不報。高傑至睢州。爲許定國所殺。可法仍使傑妻邢氏與子元爵主營事。甲辰。以殿宇鼎新。賜馬士英、韓贊周以下二十餘人銀幣。仍諭修奉先殿午門及左右掖門。責田成於嘉杭二府。速選淑女。二月甲寅朔。改上懷宗廟號曰毅宗。上太子諡曰獻愍。永王曰悼。定王曰哀。